



GEBROKE



VRYGESPREEK



DIENSBAAAR

VERSLAG VAN DIE SINODALE DIENSRAAD VIR GEMEENSKAPSBETROKKENHEID

Hierdie verslag fokus op sekere prioriteite wat deur die SDGB as kritiese sake op die kerk se agenda vir gemeenskapsbetrokkenheid geïdentifiseer is. Hierdie agenda word onder andere bepaal deur dit wat uit die werksaamhede van gemeentes en diensorganisasies blyk. Op voetsoolvlak is dit gemeentes en diensorganisasies wat die nood die beste verstaan en hierdie verslag is 'n poging om die werksaamhede binne die gebied van die Noordelike Sinode weer te gee asook om sekere tendense aan te toon. Die veronderstelling is ook dat hierdie geïdentifiseerde prioriteite deur taakgroepe van die Sinode aangespreek word en werksaamhede gekoördineer word. Die hoop word uitgespreek dat hierdie verslag gemeentes opnuut sal inspireer om hulleself te verstaan as kerk ter wille van die gemeenskap.


Die verslag word volgens die volgende geïdentifiseerde prioriteite aangebied:

- Armoedeverligting
- Bediening aan siekes en gestremdes
- Substansafhanklikheid en trauma
- Bediening aan verwaarloosde kinders, gebroke gesinne en gemarginaliseerdes
- Bediening aan bejaardes
- Ekologie
- Zimbabwe

Alhoewel die diensorganisasies wat in vennootskap met die kerk funksioneer op meer as een van bogenoemde terreine diens lewer, gaan die diensorganisasies telkens ter sprake kom op die terrein wat hulle hoof fokusarea is.

1. ARMOEDE

*1. Volgens die Verenigde Nasies se skatting het die wêreldbevolking verlede jaar (Okt 2011) die 7 biljoen merk oorskry. Wêreldbank statistiek (sien grafiek) van 2005 beweer dat bykans 80% van die wêreld se bevolking met minder as \$10 per dag moet klaarkom. Dit is ongeveer R2 500 per maand. Helfte van die wêreld se bevolking het egter gemiddeld net ongeveer R800 per maand om van te leef. Dit is min of meer gelykstaande aan die rekening as vier mense gaan uiteet. Daar is darem nie net slegte nuus nie. Die Wêreldbank se monitoring van uiterste armoede (verdiensle van minder as \$1.25 per dag) toon aan dat sedert 1990 die persentasie mense wat in uiterste armoede leef, besig is om af te neem. Gemet aan die wêreldbevolking is dit egter 'n geweldige hoeveelheid mense. Vandag is dit bykans 1.3 biljoen mense wat in uiterste armoede leef, waarvan ongeveer 'n 1/3 in Sub-Sahara Afrika woon. Die afname van uiterste armoede vind by verre die stadigste plaas in Sub-Sahara Afrika. 'n Vergelyking met die ander ontwikkelende wêrelddele toon aan dat uiterste armoede gedurende die tydperk tussen 1990 tot 2008 in Sub-Sahara Afrika slegs met 9% van die bevolking afgeneem het in vergelyking met baie hoër persentasies in die ander ontwikkelende wêrelddele. In ander ontwikkelende wêrelddele het hierdie persentasies byna gehalveer.



PERSENTASIE VAN DIE BEVOLKING VAN ONTWIKKELENDE LANDE WAT IN UITERSTE ARMOEDE LEEF. (MINDER AS \$1.25 PER DAG).

WÊRELDDEEL	% VAN BEVOLKING 1990	AANTAL MENSE 1990	% VAN BEVOLKING 2008	AANTAL MENSE 2008
OOS-ASIË	56.2	926,4 MILJ	14.3	284.4MILJ
CHINA	60.2	683.2 MILJ	13.1	173.0 MILJ
OOS EUROPA/SENTRAAL ASIË	1.9	8.9 MILJ	0.5	2.2 MILJ
SUID AMERIKA	12.2	53.4 MILJ	6.5	36.8 MILJ
MIDDE-OOSTE EN NOOD-AFRIKA	5.8	13.0 MILJ	2.7	8.6 MILJ
SUID-ASIË	53.8	617.3 MILJ	36.0	570.9 MILJ
SUB-SAHARA AFRIKA	56.5	289.7 MILJ	47.5	386.0 MILJ
TOTAAL	43.1	1908.6	22.4	1289.0 MILJ

*2. Die feit dat Afrika baie swakker presteer, hou verband met verskeie faktore. Van die belangrikste faktore waarop literatuur fokus, is die volgende:

- Historiese faktore wat verband hou met koloniale uitbuiting
- Swak regering en korrupsie
- Volgehoue politieke konflik en oorlog
- Onoordeelkundige investeringsbeleid van ontwikkelde lande en finansiële instellings
- Swak infrastruktuur en opvoeding, wanvoeding en gesondheid.

*3. Die lys kan nog verleng word en die oorsake gedebatteer word maar die feit bly staan: Afrika is die armste kontinent ten spyte van 'n rykdom aan hulpbronne. Die hartseer van die verhaal oor armoede is egter nie dat geld te min is nie maar eerder 'n geval van geld wat verkeerd bestee word. 'n Interessante oorsig oor bestedingstendense toon aan dat besteding op armoedeverligting 'n lae prioriteit geniet.

*4. Die jongste aanduidings is dat Suid -Afrika se bevolking nou die 50-miljoen kerf bereik het. Die getal onwettige immigrante is moeilik om te bepaal maar daar is ontleders wat onwettige immigrante in Suid-Afrika op meer as 5 miljoen mense skat waarvan sowat 3 miljoen uit Zimbabwe kom. Suid-Afrika het die grootste aantal asielsoekers in die wêreld. In die laaste amptelike dokument oor armoede wat in 2002 deur Statistiek Suid-Afrika gepubliseer is, is armoede gemeet aan 'n standaard (broodlyn) van R800 per maand, per huishouding. Volgens hierdie meting het 28.5% van alle huishoudings in Suid-Afrika onder die broodlyn geleef. Wanneer die algemene standaard van \$1.25 per capita egter aangewend word, styg die persone in Suid-Afrika wat onder die broodlyn leef tot 48,4%.

*5. Nog 'n belangrike insig in die sosio-ekonomiese omstandighede in ons land is die feit dat Suid-Afrika ook oor baie rykes beskik. Dit is algemeen bekend dat die gaping tussen ryk en arm van al die wêreldlande in Suid-Afrika die grootste is. Hier word dus ook baie bestee en geld is beskikbaar. Statistiek van 2002 het aangetoon dat die munisipale gebiede van Pietersburg en Pretoria onderskeidelik die eerste en derde posisie beklee het ten opsigte van per capita besteding. Selfs Soutpansberg het onder die top vyf munisipale gebiede geval. Hoe hierdie statistiek oor die afgelope 10 jaar verander het, is nog nie duidelik nie.

*6. Die omvang van die armoedeprobleem blyk duidelik uit die terugvoer van gemeentes. By twee padberade rondom gemeenskapsbetrokkenheid wat deur die SDGB aangebied is, is die saak van armoede ook duidelik op die tafel geplaas. Dit het daartoe aanleiding gegee dat die SDGB in samewerking met PEN twee armoedekonferensies aangebied het. Hierdie konferensies val deesdae saam met PEN se SiCiLi konferensie en word vanjaar in Augustus weer aangebied.

Afrika bestee gemiddeld \$18biljoen aan oorlog per jaar. Europe bestee \$11biljoen op roomys, \$50biljoen op sigarette en \$105 biljoen op alkohol per jaar. Wêreldwyd word \$400biljoen op dwelms en \$780 biljoen op militêre instellings bestee.

<http://www.globalissues.org>

*7. Daar is nie 'n enkele gemeente wat nie op die een of ander wyse by armoedeverligting betrokke is nie. Die volgende bied 'n samevatting van wat die gemeentes doen op die terrein van armoedeverligting.

1.1 Gemeentes se betrokkenheid by armoedeverligting

1.1.1 Kos- en klerevoorsiening

Byna elke gemeente het een of ander projek waarin kos en klere aan mense voorsien word. Hierdie projekte wissel van die voorbereiding en verskaffing van etes tot die voorsiening van kospakkies aan mense in nood. Die kosprojekte word in die meeste gevalle ook gesien as 'n manier van uitreik na nie-lidmate. Daar is gemeentes wat uitreik na plakkerskampe in hulle omgewing, of na skole waar kinders gevoed word. Die gemeentes in Limpopo berig almal dat die probleem van onwettige immigrante ook 'n appèl op hulle kerkwees maak. Uitreik met woord en brood vind in al die dorpe en stede op die N1-korridor plaas.

1.1.2 Plakkerskampe

Plakkerskampe bied 'n baie besondere uitdaging aan gemeentes. In die Kameeldrift-omgewing reik die gemeente uit na plakkerskampe deur die NWO Kamcare wat vanuit die gemeente se bediening ontwikkel het. Florauna gemeente neem die inisiatief rondom uitreik na Soshanguve en Pretoria -Noord. Die bedieningsmodel van Florauna is veral sinvol aangesien hulle by reeds bestaande projekte aansluit om die projekte te bemagtig.

1.1.3 Skole

Skole bied vir baie gemeentes 'n uitreikgeleentheid. Die omvang van armoede blyk duidelik in die verskynsel van honger kinders by die skole. Skole in plakkerskampe, dorpe en voorstede word bedien deur kospakkies te versprei. Gemeentes soos Booyesen, Dwaalboom en Daspoort het pragtige inisiatiewe in hierdie verband. Rustenburg Moedergemeente het 'n besondere projek waarmee hulle na kinders in nood uitgereik. Hulle is tans besig om hierdie projekte in 'n Nie-Wins Organisasie (NWO) te organiseer. (Vision of Hope Foundation).

1.1.4 Armoede onder lidmate

*1. Gemeentes word al hoe meer gekonfronteer met die feit dat aktiewe en betrokke lidmate nie meer in staat is om kop bo water te hou nie. Die druk op sekere gemeentes is groot deurdat hulp verleen moet word ten opsigte van lidmate se basiese uitgawes soos munisipale rekeninge, mediese onkoste en skoolfonds (Blouberg, Pretoria Tuine). Kospakkies word op gereelde basis aan talle lidmate veral in die middestedelike gebiede verskaf. Sommige gemeentes het betrokke geraak by Solidariteit se projek "Helpende Hand" en bring opnuut die probleem van "blanke armoede" onder ons aandag.

*2. Verskeie voorstedelike gemeentes (Bergtuin, Groenkloof, Reeds, Haakdoorn) het aangedui dat hulle by "Doulos", Sonskyn en Javes (sogenaamde wit plakkerskampe) betrokke is. Voorstedelike gemeentes berig ook oor die sogenaamde "stil armoede" probleem. Lidmate wat nie meer in staat is om lopende uitgawes te delg nie verkeer in 'n krisis. Die nuwe-effek hiervan is verdere sosiale probleme soos alkoholmisbruik en gesinsgeweld. Ook emosionele en verhoudingsprobleme neem toe as gevolg van finansiële probleme.

*3. Armoede is hoog op die agenda van gemeentes en daar word daadwerklik gepoog om iets aan hierdie probleem te doen. Dit is duidelik dat gemeentes in die lig van hierdie probleem al hoe meer gemeenskapsgerig bedien en nuut oor die roeping van kerkwees dink. Met vrymoedigheid kan beweer word dat die gemeentes van die Noordelike Sinode inderdaad 'n verskil maak as dit by die kwessie van armoede kom.

1.2 Diensorganisasies wat by armoedeverligting betrokke is

*1. 'n Baie positiewe tendens het sedert die vorige sinodesitting ontwikkel. Al hoe meer gemeentes verstaan hulle roeping in terme van gemeenskapsgerigte bediening en in die proses het nuwe NWO's deur middel van gemeentebediening tot stand gekom. Hierdie geloofs-gebaseerde organisasies ontstaan naas gemeentes en ontwikkel as kosbare bedieningsvennote en diensverskaffers van/aan die kerk. Dit is 'n nuwe gedaante van kerkwees wat baie beslis 'n legitimiteit aan ons kerkwees verleen en gemeentelike uitdaging om meer betrokke te raak. Dikwels bied kerklike strukture nie altyd die geleentheid vir betrokkenheid nie maar NWO's as bedieningsinstrumente van die kerk gryp lidmate se verbeelding aan en motiveer hulle tot diensbaarheid. Die sukses van hierdie bedienings is die feit dat dit projekgedrewe is en aan lidmate die geleentheid bied om direk by nood betrokke te raak.

Ons berig oor nuwe NWO's wat die afgelope tyd uit verskillende gemeentes se gemeentebediening ontwikkel het.

*2. In hierdie verslag word daar oor nuwe NWO's gerapporteer wat nog nie in die vorige sinodeverslag verskyn het nie. Met dankbaarheid word ook kennis geneem van die feit dat die ander meer bekende NWO's ook almal nog goed funksioneer. Die werk van die vennote word in 'n bylaag meer breedvoerig bekendgemaak.

stel en uitstallings word ook tydens die Sinode gedoen. Ons neem met groot dank kennis van die werk van ons bedieningsvennote,

1.2.1 Kamcare

Kamcare (’n artikel 21-maatskappy) het uit die NG Kerk Kameeldrif ontstaan om die behoefte aan terapeutiese dienste na aanleiding van die hoë voorkoms van misdaad in die omgewing, sowel as die oorsake van misdaad, aan te spreek. Armoedeverligting bly een van die hooffokusareas van die bediening. Die organisasie wil help om ’n gesonde gemeenskap op ’n volhoubare manier te ontwikkel en om opleiding te verskaf wat mense in staat stel om hulleself te bemagtig. Dit word gedoen deur 5 sentrums:

- Wellness Centre – terapeutiese dienste
- Kinderontwikkelingsentrum – naskool, vakansieprogram
- Gemeenskapsontwikkelingsentrum – kos, klere, komberse, sonpanele in die plakkerskamp, ondersteuning van ander sorg-organisasies
- Opleidingsentrum – besigheidsvaardighede, leierskapsvaardighede, naaldwerkvaardighede, huishulp opleiding, finansiële opleiding, ouerleiding, huweliksvoorbereiding, informele predikantopleiding, NPO opleiding.
- Besigheidsondersteuning sentrum – ondersteuning van nuwe entrepreneurs, spanbou, visionering ensovoorts.

1.2.2 Moot Care

*1. Ongeveer 10 jaar gelede het “Brood vir Nood” as gemeenskapsprojek ontstaan deur ’n inisiatief van die NG Gemeente Rietfontein-Suid. Met die groei van die projek het dit ’n ringsprojek geword van die ring van Villieria. Oor jare het projekte uitgebrei na voedsel, klere, polisie-ondersteuningsdiens, krisissentrum en hospitaaldienste. Om veral te fokus op werksoekers is ’n nuwe projek bekend as Jakob se Put gestig. Die Ring van Sentraalmoot het egter die behoefte geïdentifiseer om ’n groeiende nood in die Mootgemeenskap beter en meer effektief aan te spreek. Daar is besluit om ’n Sentrum van Hoop te stig. Die Noordelike Sinode het ’n groot rol gespeel deur dit finansiële moontlik te maak om Moot Care sentrum te stig. Moot Care Sentrum is op 28 Junie 2010 gestig.

*2. Moot Care sentrum lewer gemeenskapsdienste wat tot opbou en ontwikkeling van die gemeenskap bydra. Dit sluit in: om armoede te bekamp, om persone wat verskillende vorms van nood ervaar, te ondersteun en om familiestabiliteit te bevorder. Dit doen Moot Care deur berading, toerusting en opleiding, voedselskemas, klereprojekte, werkskeppingsprojekte, hospitaal- en traumaspanne, opheffing van werksoekers, enkelouer-ondersteuning en netwerke met ander NWO’s in die Moot.

1.2.3 Vision of Hope Foundation

*1. Vision of Hope is ’n nie-winsgewende organisasie, tans in die proses van registrasie, wat Rustenburg en omliggende gebiede bedien. Die organisasie is geaffilieer met NG Rustenburg- Moedergemeente. Vision of Hope poog om veral minderbevoorregte kinders in agtergeblewe gemeenskappe hoop te gee deur hul maatskaplike funksionering en menswees te verbeter. Hulle werk behels bemagtiging deur onder andere opvoeding, aanleer van lewensvaardighede en voedselvoorsiening. Voedselvoorsiening word by veral twee skole gedoen, te wete Laerskool Rustenburg en Vuka Farm School.

*2. ’n Kinderweek, gerig op laerskoolkinders, word tydens die Julie vakansie aangebied. In 2011 het 360 kinders die week bygewoon. Vision of Hope bied ook verskeie kampe vir laerskoolkinders aan. Met hierdie kampe word daar gefokus op waardes en lewensvaardighede. Een van die projekte wat verder uitgelig kan word is dansterapie met gestremdes wat weekliks aangebied word.

*3. Afgesien van die werk onder kinders is daar ook ’n projek bekend as “180°”. Hierdie projek behels die voorkoming, rehabilitasie en nasorg van verslaafdes. Met al die projekte is hande gevat met CMR Rustenburg. Verdere besonderhede kan gekry word by www.visionofhopefoundation.com

1.2.4 Judea Getuienisforum

*1. Die Judea Getuienisforum (JGF) het sy ontstaan in die laat 1990’s gehad. Daar was ’n behoefte aan samewerking tussen die NG Kerk en die VG Kerk nadat amptelike bande verbreek is. Die NG Kerk se Ring van Pietpotgietersrus het die leiding geneem en die verhouding tussen die twee kerke binne die Judea Getuienisforum saamgebind. Die eerste grondwet is gedurende 2001 aanvaar met die NG Kerk en VG Kerk as gelyke vennote.

*2. Die JGF se eerste prioriteit is die bou van verhoudinge tussen lidmate van die twee kerke. Die behoefte aan toerusting en opleiding by die VGK het daartoe gelei dat werkwinkels, kampe en uitreike gehou word in ’n poging om die lidmate van die VGK toe te rus. Daar is ook ’n behoefte aan ondersteuning aan die VGK, waar groot armoede heers, daarom het die JGF begin om kerkgeboue te help bou, ander te voltooi en verskeie ander is herstel. Dieselfde behoeftes is ook binne die gemeenskappe waarbinne die VGK werk geïdentifiseer en daarom het die JGF betrokke geraak by verskeie sentrums vir gestremdes asook by kwesbare kinders.

*3. Aangesien armoede een van die groot probleme in die plaaslike gemeenskappe is, het die ondersteuning van JGF op verskeie gebiede die enigste manier geword waar die sentrums binne die gemeenskappe ondersteun word. In samewerking met ander organisasies word die sentrums van kos, klere, gas, ensovoorts voorsien. Die beeld van samewerking tussen die NG Kerk en VG Kerk bevorder die aanvaarding van die JGF binne die gemeenskappe.

1.2.5 Hulp in Elke Behoeft (HIEB)

*1. HIEB is 'n interkerklike Christelike organisasie wat homself ten doel stel om mense binne die Polokwane gemeenskap, wat nie 'n menswaardige bestaan kan voer nie, by te staan in 'n proses om hul potensiaal te ontgin en te ontwikkel. Dit het as 'n voedingskema reeds in 1987 begin toe 'n enkele familie die roeping gevoel het om kospakkies en soms selfs oornagfasiliteite aan straat mense van Polokwane te verskaf. In 2001 het nog 'n barmhartigheid Samaritan 'n erf beskikbaar gestel waarop hout huise opgerig kon word om aan werkloses mense bemusing te verskaf.

*2. In 2007 is hierdie plek van Hoop op Hoewe 16 te Dalmada gevestig. In dieselfde jaar is HIEB as artikel 21 maatskappy gestig. HIEB fokus veral op behuising, klerasie en voeding vir enkellopende vroue, vroue met kinders en gesinne. Aan hulle word 'n veilige omgewing verskaf asook geestelike en maatskaplike dienste. Verder stel hulle persone met potensiaal, wat graag wil leer en bereid is om te werk, aan 'n doelgerigte lewe voor. Pietersburg-Noord gemeente en met name ds Hannes Bezuidenhout is veral by die projek betrokke.

2. BEDIENING AAN SIEKES, GESTREMDES EN SUBSTANSAFHANKLIKES

2.1 Die groot MIV/vigs uitdaging

*1. Bediening aan siek persone is 'n vanselfsprekende deel van die ampsbediening van gemeentes. Sieke-pastoraat geniet prioriteit in byna al die gemeentes van die Noordelike Sinode. Die NG kerk is egter onlangs gekonfronteer met die vraag na ons betrokkenheid by die MIV/Vigs pandemie. In die media is die kerk selfs beskuldig dat ons niks doen nie. Uit die verslae van die kerk se bedieningsvennote soos CMR, PEN en HospiVisie blyk dit dat daar omvangryke betrokkenheid is, maar op gemeentevlak is dit grootliks die geval dat meeste lidmate MIV/vigs moontlik nie as 'n probleem ervaar nie. Die MIV/vigs probleem raak die meeste van ons lidmate nie direk nie en daarom verskyn dit nie op agendas nie.

*2. Die Noordelike Sinode het reeds die eerste tree gegee om hierdie probleem aan te spreek deur die stigting van 'n Vigsforum onder leiding van die inisiatief van dr Hannes van der Walt. Hierdie forum het ten doel om fondse, geormerk vir die saak van vigs, te bestuur asook om die Sinode rondom hierdie aangeleentheid te adviseer. Vanuit die forum word aansoeke vir buitelandse befondsing ten opsigte van vigsprojekte gekoördineer. Die Forum skakel direk met NWO's soos CMR, PEN en HospiVisie wat vigsverwante projekte bedryf.

*3. Die SDGB het reeds die probleem van veral vigsweeskinders as 'n belangrike prioriteit geïdentifiseer en berig graag oor 'n baie besondere projek wat in die vooruitsig gestel word, naamlik die *Nommer Asseblief* Projek.

Nommer Asseblief – ons gaan help met die vigs pandemie!

*4. Met 'n krisis van 1,5 miljoen vigsweeskinders in ons land, is hierdie 'n ongelooflike geleentheid vir die kerk om 'n direkte verskil te maak in die toekoms van ons land. Die NG Kerk het ongeveer 'n miljoen belydende lidmate, in meer as 'n duisend gemeentes. Ons behoort met 'n kreatiewe plan hierdie uitdaging te kan aanspreek.

*5. Die plan behels dat kinders in krisis deur middel van 'n databasis deur selfoonkontak verbind word met iemand wat hulp kan verleen. Hulpgewende organisasies soos PEN en ander wat graag wil inskakel, sal direk verantwoordelik wees om kinders se behoeftes per databasis te dokumenteer en individuele kinders te koppel aan gemeentede wat bereid is om by 'n kind se versorging betrokke te raak. Die doel van die projek is om die sosio-ekonomiese behoeftes van weerlose kinders binne die gebied van die Noordelike Sinode aan te spreek, met 'n fokus op kinders wat alleen vir die bestuur van 'n huishouding verantwoordelik is. Die doelwitte van die projek is soos volg:

- Identifiseer die kinders, asook die behoeftes van kinders wat alleen verantwoordelik is vir huishoudings
- Ontwikkel 'n databasis wat die gesondheidsnood, opvoedkundige nood, psigo-sosiale nood en geestelike nood van 'n kind kan dokumenteer.
- Ontwikkel 'n verwysingsstelsel wat verseker dat al bogenoemde behoeftes aangespreek kan word
- Bou plaaslike netwerke en vennootskappe met gemeentes en organisasies wat saam hierdie uitdaging kan aanspreek
- Ontwikkel 'n ondersteuningsnetwerk wat gemeentede en individue in staat kan stel om persoonlik by 'n spesifieke kind betrokke te raak.

*6. Tans is die vennote in hierdie groot droom PEN, FPD (Foundation for Professional Development) en die Noordelike Sinode. Saam droom ons om die krisis van 'n groterwordende getal weeskinders in ons land een

kind op 'n slag aan te spreek. Die NG Kerk, en spesifiek die Noordelike Sinode, beskik oor die potensiaal van duisende mense wat 'n hart het om die lot van weeskinders te verlig. Hierdie projek sal dit vir gemeentelede prakties en maklik maak om in jou huis te sit en nogtans 'n weeskind se lewe te verander.

2.2 Bediening in hospitale

Hospitale is plekke van hoop en genesing, maar ook van pyn, onsekerheid en verlies. Die kerk het geen keuse as om daar teenwoordig te wees nie. Afgesien van ampsbediening waar veral lidmate deur gemeentes besoek word, is HospiVisie die Noordelike Sinode se uitreik vennoot in hospitale. 'n Organisasie wat die kerk se teenwoordigheid in hospitale op 'n besondere wyse legitimeer en die kerk voortdurend bewus maak van die appèl wat siek mense op ons maak.

2.2.1 Hospivisie

*1. HospiVisie het ontstaan gedurende die uitfasering van die hospitaalleraarspos by die destydse HF Verwoerd Hospitaal in die tydperk 1996-1997. Dit was gou duidelik dat die NG Gemeente Riviera en die Ring van Eloffsdal nie in staat sou wees om die pos van 'n voltydse hospitaalleraar te dra nie. Die Ring het 'n Hospitaalbedieningskommissie in die lewe geroep om die bestaande bediening te ondersteun en die saak te ondersoek. Die Sinode het steeds ondersteuning gebied deur die pos van die sekretaresse te befonds. Die uiteinde van die proses was dat hospitaalbediening as 'n ringsaksie goedgekeur is. HospiVisie as organisasie het hieruit ontstaan en is in 1999 as nie- winsgewende organisasie geregistreer. Die Noordelike Sinode, Ring van Sentraalmoot en die Riviera-Jakaranda gemeente is steeds ten nouste betrokke.

*2. By HospiVisie word 'n verskeidenheid geleenthede benut om God se liefde in hospitale te deel en so die Koninkryk ook daar te vestig. Wanneer mense in situasies beland waar daar vrae is wat nie altyd beantwoord kan word nie, kan hulle Jesus ervaar deur die teenwoordigheid van 'n medemens. HospiVisie is dus 'n natuurlike en onontbeerlike deel van die hospitaal omgewing. Hulle bring hoop en genesing deur geestelike sorg en berading aan pasiënte, families en personeel. Hulle reik spesifiek uit na kwesbare groepe soos kinders en mense wat leef met MIV en VIGS. Opleiding om in die moderne gesondheidsorg omgewing te werk, is veral deel van hulle kernbesigheid.

2.2.2 Weskoppies Hospitaal

*1. Weskoppies Hospitaal is 'n psigiatryse hospitaal van die staat wat die hele binnelandse gebied van ons Noordelike Sinode bedien. 12 500 persone word jaarliks deur die hospitaal behandel. Wespoort Gemeente is die geestelike tuiste van waar die bediening in Weskoppies onderneem word, terwyl die Noordelike Sinode die bediening in samewerking met Weskoppies Hospitaal finansiële ondersteun. Omgee- en vriendskaps-groepe uit gemeentes is as lede van "Vriende van Weskoppies", 'n geregistreerde NWO, by verskeie sale betrokke. Die gemeentes is: Wierda Park, Eldoraigne, Valhalla, Valhalla-Suid, Wespoort, Quaggapoort, Wesmoot, Magalieskruin, Pierre van Ryneveld, Olifantsfontein, Florandia, Raslouw en Oosterlig.

*2. Naas NG Gemeentes, is daar ook betrokke vanuit ander kerke: Die Methodiste Gemeente van Bryanston, Brooklyn en Valley Methodiste gemeentes, asook Pretoria Community Ministries is betrokke. Ds Pieter de Wet behartig die pastorale begeleiding van pasiënte en die SDGB is besonder dankbaar vir die toewyding waarmee hy daar bedien.

2.3 TOIBO

*1. Die Transoranje Instituut vir Buitengewone Onderwys koördineer die kerklike betrokkeheid by vyf skole vir leerders met spesiale behoeftes. Die skole is

- Hoërskool Martie du Plessis vir Serebraalgestremdes (Bloemfontein)
- Prinshofskool vir Gesiggestremdes
- Sonitusskool vir Gehoorgestremdes
- Transoranje-skool vir Dowes
- Transvalia-skool vir Epilepsie en Leergestremdheid.

*2. Die Instituut is op 13 Maart 1947 gestig met die hoofdoel om 'n skool vir dowes in die noorde van die land te vestig. Die Transoranje Skool vir Dowes is op 16 Augustus 1954 geopen. Die Noordelike Sinode (toe nog as deel van die NG Kerk van Transvaal, is 'n stigterslid.

*3. Die hoofdoel van die Instituut is om fondse te vind wat hoofsaaklik vir die skole se bedryfsbegrotings aangewend word.

*4. Meer inligting oor die Instituut en oor die vyf skole kan op die webblad www.toibo.org.za gekry word.

3. SUBSTANSAFHANKLIKHEID EN TRAUMA

*1. Substansafhanklikheid bly een van Suid-Afrika se grootste sosiale probleme. Na raming kos alkoholmisbruik die land R38 miljard per jaar. 'n Opname onder sewentienjarige seuns het aangetoon dat 50%

reeds gereeld alkohol gebruik voordat hulle die wettige ouderdomsperk van 18 bereik. In die geval van dogters is dit ongeveer 35%.

*2. Die impak van dwelmmisbruik is waarskynlik nog groter. Suid -Afrika se dwelmmisbruik is dubbeld die wêreldgemiddeld en die verband tussen dwelmmisbruik en misdaad is duidelik. Baie sinlose geweld word gepleeg slegs met dwelmgebruik as motivering. Die dwelmmisbruik onder jong tieners is aan die toeneem en gewetenlose dwelmhandelaars kry reeds kinders onder die ouderdom van 10 jaar in hulle greep.

Suid-Afrikaners se dwelmmisbruik is dubbeld die wêreldgemiddeld

*3. Afgesien van die meer bekende dwelms soos dagga, heroïne en kokaïne word daar voortdurend met nuwe kombinasies geëksperimenteer. Persone wat behandeling vir sekere dwelms ontvang, is dikwels onbewus van die feit dat hulle ook 'n afhanklikheid van ander dwelms ontwikkel het aangesien die handelaars die dwelms meng. Stabilis berig alhoemeer van pasiënte wat aannem vir behandeling vir kokaïne-afhanklikheid en dan tydens behandeling te ontdek dat hulle ook van heroïne afhanklik is.

*4. Waarskynlik die grootste dwelmprobleem in ons sinodale gebied, is die toename in die gebruik van "nauype". Dit is 'n mengsel van dagga en heroïne en word veral deur jong swartmense gerook. Die fisiese afhanklikheid van hierdie dwelm is geweldig omvangryk en talle jongmense se lewe word vroeg reeds hierdeur verwoes. Nog 'n nuwe dwelm op die mark is die sogenaamde "vunga" wat bestaan uit "nauype" gemeng met huishoudelike gifstowwe soos rottegif en anti-virale middels. Hierdie dwelm word onder andere ook gebruik vir die hallusinerende effek daarvan. Die tragedie van hierdie dwelm is die feit dat desperate arm mense hulleself doelbewus met die MIV- virus besmet sodat hulle toegang tot anti-virale middels kan kry, waarna hulle die middels dan aan dwelm-handelaars kan verskaf vir 'n inkomste.

*5. Die voorkeurdwelm onder veral die wit jeug is CAT/KAT. Hierdie is 'n dwelm wat onlangs op die mark verskyn het en bied vir baie mense 'n alternatief tot kokaïne. Dit is baie goedkoper om te vervaardig aangesien dit sinteties by die huis vervaardig word uit produkte en medikasie wat oor die toonbank gekoop kan word. Die dwelm is hoogs afhanklikheidsvormend en die sosiale impak vernietigend. Die bekostigbaarheid van CAT maak dit een van die gevaarlikste dwelms op die mark. Jongmense met beperkte inkomste kry baie maklik toegang daartoe of vervaardig dit self.

*6. Levubu gemeente berig van 'n mooi projek waarby die SDGB ook betrokke geraak het. Hulle identifiseer kinders met afhankheidsgedrag en staan hulle met psigiatriese hulp by. Die gemeente skakel hulle in die gemeenskap in en verhoed sodoende die vorming van dwelm sub-kulture

3.1 Stabilis

*1. Nog 'n verhaal van hoop in die stryd teen dwelmafhanlikheid, is die feit dat ons as kerk nog steeds op Stabilis Behandelingsentrum as bedieningsvennoot kan staatmaak. By Stabilis word daar gemiddeld sowat 500 pasiënte per jaar behandel. Wat die bedryf betref kan Stabilis nie meer op staatsubsidie reken nie en sal die ondersteuning van gemeentes in die toekomst meer belangrik word. Tot dusver is ons dankbaar om te rapporteer dat Stabilis nog geen eise aan die sinodale begroting stel nie. Die SDGB ondersteun wel 'n fonds by Stabilis wat daarop gemik is om pasiënte te help wat nie vir behandeling kan betaal nie. Gemeentes moet asseblief ook hierdie projek in gedagte hou vir moontlike ondersteuning.

*2. Naas die behandeling van substansafhanklikheid lewer Stabilis ook 'n groot bydrae ten opsigte van navorsing en die opleiding van professionele persone soos sielkundiges en maatskaplike werkers. Stabilis bly betrokke by die werk van die CAD en gemeentes word opnuut versoek om betrokke te raak by die stigting van nuwe CAD takke in ons sinodale gebied. (Die werksaamhede van die CAD word in die bylaag wat tydens die sinodesitting beskikbaar gestel word, meer breedvoerig bespreek).

*3. Sedert die vorige Sinodesitting het Stabilis die terrein van traumaberading betree en word daar met groot opgewondenheid oor hierdie projek berig. Met die inisiatief van een van Stabilis se werknemers, Jacques Botes, is die Mon Ami Trauma Troops gestig.

3.2 Mon Ami - Trauma Troops

*1. Mon Ami – Trauma Troops (MATT) het in 2007 ontstaan as deel van 'n gemeenskapsprojek van Stabilis Behandelingsentrum. Sedert 2008 het die Môregloed Gemeente aktief betrokke geraak by die werk van MATT. Ds. Dirk van Zyl het die opleiding voltooi en ook as voorsitter van die projek gedien tot 2010. Gemeentelêde en predikante het toenemend aktief betrokke geraak by MATT. Die organisasie speel 'n belangrike rol om gemeentes en predikante by die werk van die nooddienste van Tshwane betrokke te maak. MATT en die Mootvallei Gemeente is tans in die proses om 'n samewerkingsooreenkoms te vestig met die doel om vrywilligers van die gemeente op te lei.

*2. MATT lewer 'n unieke diens in die gemeenskap, aangesien daar tans nie 'n soortgelyke organisasie bestaan wat ondersteuning bied aan persone (binne 72 uur), wat deur trauma geraak word nie. Die diens word gelewer deur vrywilligers wat bereid is om hulle tyd af te staan om hulle medemens in nood te bedien. Verantwoordelike dienslewering word verseker deur 'n etiese kode waaraan MATT en sy lede hul verbind.

Die basis van die etiese kode is vervat in die Persoongesentreerde Waardes van respek, individualisering, selfbeskikking en vertroulikheid.

4. BEDIENING AAN VERWAARLOOSDE KINDERS, GEBROKE GESINNE EN GEMARGINALISEERDES

Die bediening aan verwaarloosde kinders en gebroke gesinne verg meer as net gewone ampsbediening. Met dankbaarheid kan kennis geneem word dat gesinsbediening 'n prioriteit in meeste gemeentes is, maar die gebrokenheid en verwaarloosing is dikwels as gevolg van komplekse sosiale problematiek wat professionele hulp verlang. In hierdie verband is die professionele diens van die diensorganisasies in die SKDB sisteem onontbeerlik. Die Noordelike Sinode kan opnuut met groot dank kennis neem van die belangrike werk wat deur veral die drie kinderhuise (Abraham Kriel, Jakaranda en Louis Botha) en die CMR in hierdie verband gedoen word. Met dankbaarheid kan daar ook berig word van talle gemeentes wat nog by die kinderhuise betrokke is. Omvattende versorging word aan ongeveer 460 kinders in die kinderhuise gebied; terwyl die kindersentrum van die CMR 'n professionele diens van hoogstaande gehalte lewer, wat kinder- en gesinsleiding asook sielkundige dienste insluit. Daar is nog diensorganisasies wat met toewyding 'n vangnet bied vir jongmense en gemarginaliseerde mense wat dikwels geen heenkome het nie. In hierdie verband neem die Sinode ook met dank kennis van die belangrike werk van nog twee bedieningsvennote (PEN en ECHO) wat in samewerking met gemeentes die visie van ons Sinode om 'n verskil te maak, gestand doen.

4.1 Die CMR

Ten spyte van baie uitdagings en moeilike ekonomiese omstandighede die afgelope boekjaar, is dit met groot dankbaarheid dat CMR, met die ondersteuning van die Sinode, Ringe en Gemeentes, steeds die volgende dienste kon lewer.

4.1.1 Struktuur en programme

*1. CMR Noord is verantwoordelik vir die bestuursondersteuning en bemagtiging van 17 Sentrums van Hoop en kantore waarby 64 maatskaplike werkers, 30 hulpwerkers/studente, 25 administratiewe personeel en 'n vrywilligerskorps van ongeveer 200 betrokke is.

*2. Met betrekking tot bestuursondersteuning en bemagtiging was die bestuurspan verantwoordelik vir die volgende:

- Beplanning en ontwikkeling van dienste
- Menslike hulpbronontwikkeling en bestuur.
- Finansiële beplanning.
- Die daarstelling van netwerke in die gemeenskap.
- Navorsing met betrekking tot behoeftes en dienste.
- Bemaking en fondsinsameling.
- Supervisie en opleiding.
- Maatskaplikewerk-dienslewering.

*3. Om die visie en missie ten uitvoer te bring word gefokus op vier programme te wete:

- Gesinsbewaring
- Kinderbeskerming
- Armoedeverligting
- MIV/vigs

4.1.2 Direkte dienste

*1. Gesinsbewaring

Hierdie diens is aan 6093 gesinne gelewer, wat uit ± 36 000 individue bestaan. Die CMR jaarverslag (beskikbaar by www.cmrn.co.za) gee 'n verdere ontleding.

*2. Kinderbeskerming

Kinders wat ingevolge die Wet in alternatiewe sorg geplaas moes word, het 763 beloop. 'n Groot aantal van hierdie kinders wat verwyder is, was as gevolg van ernstige mishandeling en in meeste gevalle seksuele molestering. 'n Verdere diens is aan 1053 pleegkinders gelewer om toe te sien dat hulle die nodige sorg in hulle nuwe omstandighede ontvang, asook dienste om moontlike terugplasing by die ouers te bewerkstellig. Verskeie assesserings (473) en terapisessies (130) is ook deur die Kindersentrum gelewer.

*3. Armoedeverligting

Gemelde program vorm 'n integrale deel van al die dienste en verskeie gemeentes en die gemeenskap was aktief betrokke by voedingskemas en armoedeverligtings programme. Die CMR sou verseker nie sonder hulle hulp die diens kon lewer nie.

*4. MIV/vigs

In samewerking met USAID is die PEPFAR (Presidents Emergency Program For Aids Relief) program in sekere gebiede aangebied, waar 2000 kinders bereik is wat geïnfekteer en/of geïmmuniteer is. Kinders is op 'n weeklikse basis deur "careworkers" besoek en 'n verskeidenheid dienste is gelewer. In samewerking met die Departement van Gesondheid is verpleegkundige dienste ook aan persone met Vigs in die gemeenskap gelewer. Hierdie befondsing het dan ook gehelp om van die bestaande dienste/programme te finansier.

4.1.3 Posisie en tendense

- *1. Die CMR het hierdie jaar met groot dankbaarheid gedurende September 2011 sy 75e bestaansjaar gevier.
- *2. Twee nuwe CM Rade is die afgelope 10 jaar op die been gebring te wete Soshanguve en Roodeplaat wat in Oktober 2011 ingewy is.
- *3. CMR Potgietersrus het in Maart 2011 finaal sy deure gesluit nadat die maatskaplike werkerspos vir 3 jaar vakant was en die kantoor slegs met 'n aflospersoon moes funksioneer.
- *4. Verder was daar stabiliteit in die sisteem en behalwe vir die finansies was daar min knelpunte.

4.1.4 Huidige tendense

- *1. Sedert die aanvang van 2012 het die CMR se finansiële posisie dramaties agteruit gegaan en is herbesinning met betrekking tot die dienste uiters noodsaaklik.
- *2. Sedert 1994 het daar in staatsgeledere heelwat wysigings in terme van beleid en finansiering plaasgevind. Gedurende 1997 is die Wet op Fondsinsameling met die Wet op Organisasies Sonder Winsoogmerk vervang en was al die CM Rade genoodsaak om as sodanig te registreer.
- *3. As gevolg van die staat se beperkte vermoë om Welsyn te ondersteun, is die Lotto in 2004 ingestel om met befondsing behulpsaam te wees. Sedert 2004 tot 2009 is daar in 'n groot mate op die Lotto gesteun om die diens te finansier. In die totale sisteem van die CMR Noord is ongeveer R30 miljoen uit hierdie bron ontvang. Sedert 2009 word daar egter al hoe meer probleme met uitbetalings ondervind en word daar ook baie minder uitbetaal. In 2010 kon geen voorleggings gemaak word nie en in 2012 was die oorwegende boodskap dat daar nie meer op Lotto staatgemaak kan word nie en is weinig uitbetalings gedoen.
- *4. Staatsubsidie bly die afgelope jare ook konstant (en dit terwyl koste weens inflasie bly groei) en geweldig baie probleme word met die uitbetaling ondervind. Subsidies word dikwels verkeerd of baie laat betaal. 'n Voorbeeld: CMR Brits het 2 jaar laas 'n subsidie ontvang. Daar is ook 'n groot verskil in subsidie tussen die onderskeie provinsies.
- *5. Gemeentes is ook onder druk en in baie gebiede het gemeentes/ringe saamgesmelt en is hulle ook nie in die vermoë om 'n groter bydrae te lewer nie.
- *6. Die ekonomiese klimaat in die land asook wêreldwyd is onder druk, wat addisionele befondsing vanuit die gemeenskap ook bemoeilik.
- *7. Die samelewing is egter besig om teen 'n geweldige tempo op alle vlakke (ekonomies, moreel, geestelik) agteruit te gaan en die CMR word oorval met mense en kinders in nood. Die CMR was genoodsaak om verskeie keer die afgelope jaar sy deure vir nuwe aanmeldings te sluit as gevolg van die hoë werkslading van maatskaplike werkers. In baie gevalle was dit tot nadeel van erg mishandelde en gemolesteerde kinders, wat kommerwekkend is.
- *8. As gevolg van bogenoemde, maar veral as gevolg van die finansies, is die CMR by 'n kruispad en sal dienste nie meer soos in die verlede kan voortgaan nie. Verskeie kantore het nie genoegsame befondsing vir die huidige boekjaar nie en sal daar ernstig aan afskaling/herstrukturering gedink moet word. Die probleem is egter dat die gebiede waar die nood die hoogste is ook die gebiede met die minste befondsing is. Die vraag is ook watter dienste, kinders, gesinne nou weggewys moet word.
- *9. In die lig hiervan het daar reeds 'n vergadering tussen die direksie van CMR Noord, die SKDBM en lede van die Sinode plaasgevind om moontlike opsies te bespreek. Opvolgvergaderings met beheerrade van die onderskeie CM-Rade is reeds beplan. Daar moet 'n oplossing gevind word om seker te maak dat die dienste aan mense in nood kan voortgaan – maar dit sal 'n groot aanpassing in struktuur en dienste verg.
- *10. Van die opsies wat oorweeg word, is:
 - *10.1 Rasionalisering van bestaande dienste is 'n gegewe. Daar sal oor die proses besin moet word.
 - *10.2 Samesmelting van CMR-kantore. Die vraag is: watter kantore en hoe?
 - *10.3 Hersiening van die bestaande struktuur. Tans is daar afsonderlike CM-Rade en die vraag is of 'n gesentraliseerde sisteem nie oorweeg moet word nie. Heelwat implikasies is hier ter sprake wat baie samesprekings sal verg.
 - *10.4 'n Herbesinning van die naam met die oog op beter bemerking. Tans beskryf die naam nie wat gedoen word nie en bemoeilik dit die bemerking na die korporatiewe wêreld. Verskeie instansies soos PEN en MES is reeds deur hierdie oefening.
 - *10.5 'n Besinning oor die aard/inhoud van die diens wat die Kerk verwag en die finansiering daarvan sal ook aangespreek moet word.



GEBROKE



VRYGESPREEK



DIENSBAAAR

4.1.5 En nou vir die volgende 75 jaar!

*1. Dit is met groot dankbaarheid dat CMR jaarliks 'n toekening vanaf die Sinode, ringe en gemeentes ontvang en dat baie gesinne se lewens hierdeur aangeraak is. Dit is ook 'n voorreg om op hierdie manier diensbaar te mag wees. Die diens wat tans gelewer word is uiters noodsaaklik maar verkeer onder geweldige druk.

*2. Die CMR vertrou egter dat hierdie "krisis" eintlik die stimulis sal wees vir 'n wonderlike nuwe begin, wat ons sal deurdra tot die 100 jarige fees en selfs lank daarna!! Daar het al baie wonderwerke in die verlede gebeur en ons is vol vertroue dat ons saam die huidige uitdagings die hoof sal kan bied.

*3. Ons is ook dankbaar teenoor ons Hemelse Vader wat ons in staat stel om op hierdie manier diensbaar te mag wees en die afgelope 75 jaar deurlopend in ons behoeftes voorsien het.

4.2 PEN

*1. In die vroeë negentiger jare het die NG Gemeente Pretoria (Bosmanstraat) besef dat die NG kerk in sy huidige vorm nie relevant kerk sou kon wees in die 'n vinnige veranderende middestad nie. Nuwe maniere van kerk wees moes ontwikkel word. 'n Struktuur was nodig wat kon fokus op leierskapsontwikkeling, gemeenskapsmobilisering en fondswerwing. Dit moes ook 'n struktuur wees wat vinnig kon beweeg en kon aanpas by 'n dinamiese stad. Vir hierdie doel is PEN in Julie 1992 gestig. Die Noordelike Sinode en die Ring van Pretoria het die stigting van 'n nie-winsgewende maatskappy ondersteun. PEN funksioneer as Art 21 Maatskappy: 9201259/08 (013-087NPO.) en die ledevergadering is saamgestel uit kerkradslede van Moreletapark gemeente en Pretoria gemeente.

*2. PEN wil graag bydra tot die transformasie van die lewens van mense wat in die stad woon. Daar word holisties gewerk met 'n fokus op die nood van kinders en gemarginaliseerde mense. Deurlopend is die uitdaging om te werk aan die transformasie van strukture om 'n gesonde samelewing te kweek. Die strategie sluit in om te fokus op geestelike transformasie asook op die voorsiening in basiese behoeftes van mense. Die kernwerkzaamhede van PEN sluit in dissipelskap, uitreik, opvoedkunde, gesondheid, behuising en psigo-sosiale dienste. Vennootskappe is krities in die bereiking van ons drome. Danksy 'n diepgaande vennootskap tussen PEN, individuele gemeentes en die Noordelike Sinode in besonder, word mense maar veral kinders, se lewens daagliks getransformeer in Pretoria.

*3. Daar word gereeld blootstellingsgeleenthede geskep vir wedersydse betrokkenheid en leergeleenthede tussen gemeentede, gemeentes en PEN. PEN leraars speel 'n rol in die Noordelike Sinode waar moontlik. Gesamentlike projekte word geloods deur onder andere projekte soos Winterhoop. Konferensies word gesamentlik aangebied wat leergeleenthede fasiliteer (SiCiLi en armoedekonferensie). PEN vorm integraal deel van Pretoria gemeente en is ook betrokke by die bestuur van die gemeente.

*4. PEN speel 'n baie groot rol in die breë gemeenskap van Tshwane. Die rol van profeet, koning en priester in die breë samelewing, is 'n rol wat ons baie ernstig neem. PEN se visie het nog altyd die waarheid van Jakobus 1:27 ingesluit. Ware godsdiens word gemeet aan die effek van jou geloof in die wêreld. As ons as Christene nie die wêreld fisies en geestelik verander nie, mors ons die Here se genade. As jou persoonlike geloof nie transformasie bring in ander mense nie, beteken dit net vir jouself iets. Die evangelie wat Jesus verkondig, is 'n evangelie wat 'n effek het in die politiek, in die kuns, in die maatskaplike nood, in die onderwys, in opvoedkunde, wetenskap, stadsbeplanning, gesondheid, ensovoorts. Dit is ons gesamentlike uitdaging.

*5. Daar is tans 149 voltydse personeel werksaam by PEN asook baie vrywilligers. Gedurende 2011 het PEN nie minder nie as 292 000 etes wat deel vorm van gestruktureerde programme bedien, 3 400 siek mense deur die kliniek en uitreikwerkers versorg en byna 'n duisend kleuters opvoedkundig deur 'n kleuterskoolforum ondersteun. Ongeveer 3 000 kinders word weekliks deur die span van PEN bedien in klein groepe en skooluitreike. Wooneenhede word aan 657 mense voorsien in die vorm van laekoste behuising en gedurende 2011 is sowat 2 550 terapeutiese gesprekke met mense in nood gevoer.

As die hart van die stad siek is, is die hele stad siek. Ons sien dit in baie stede dat 'n middestad in effek het op die geestelike en emosionele welstand van die hele stad.

4.3 ECHO Jeugontwikkeling

*1. ECHO Jeugontwikkeling is 'n gemeenskap in die Moot wat fokus op jongmense wat aan hulle eie genade oorgelaat is. Daar is veral twee redes waarom jongmense kom aanklop om in een van die vyf huise te woon: aan die een kant is daar dié wat daar kom woon omdat hulle hulp soek: straatkinders, kinders uit mislukte kindersorgplasings, jongmense wat skielik aan hulle eie genade oorgelaat is as gevolg van een of ander krisis. Dan is daar die wat intrek met die motief om te kom help. Die wonderlike ding wat ons dikwels sien gebeur, is dat dié wat hulp soek agterkom dat hulle ook iets het om te gee en die wat wil help ontdek dat hulle ook nood het en baie het om te leer. Die idee met die ECHO Communities is om 'n genesende omgewing te skep waar mense saam kan soek – en probeer om saam weer die eenvoud van kerkwees te herontdek.



GEBROKE



VRYGESPREEK



DIENSAAR

*2. ECHO Jeugontwikkeling het elke dag programme by 7 laerskole in die omgewing, spreekkamers by hoërskole, 'n weeklikse erediens, kampe en uitreike. Ons kantoor funksioneer ook as 'n krisissentrum met onder andere twee maatskaplike werkers op ons span. Alhoewel ECHO Jeugontwikkeling 'n nie-winsgewende maatskappy is, funksioneer ons baie naby aan die plaaslike gemeentes, veral NG-Villieria.

4.4 Tshitandani Childcare Foundation

*1. TCCF het sy ontstaan gehad in die vroeë negentigs toe daar geweldig baie straatkinders in Louis Trichardt was. Die stigterslede van die destydse organisasie was prof. Koos van Rooy saam met vele ander geestelike leiers van verskillende denominasies. Ongelukkig het verskeie van die ander gemeentes oor die jare met die ondersteuning van die kinders onttrek en het basies net die NG Kerk en die Rooms Katolieke kerk oorgebly.



by die munisipaliteit.

*2. Onder leiding van Ds Louis Schnetler is 'n eiendom bekom, geskenk deur die munisipaliteit, en met 'n skenking uit Holland is 'n staalstruktuur in 2002 opgerig. Deur die jare word daar stuk-stuk gebou. In 2008/9 het 'n lidmaat van die plaaslike gemeente die volledige bedrag geskenk om die tweeverdieping gebou in totaliteit klaar te maak. Die gebou is nou voltooi maar probleme word ondervind met die aansluiting van water en elektrisiteit vanaf die munisipaliteit as gevolg van die feit dat daar op die "verkeerde erwe" gebou is. Eienaarskap van die erwe is nou onder bespreking

*3. Die doel van TCCF is om aan die straatkinders hulle menswaardigheid terug te gee. Daar word in basiese behoeftes soos veiligheid, kos en klere voorsien en die meeste van die kinders is in die skool. 'n Paar seuns kan nou al suksesvol hulle plek in die volwasse wêreld volstaan. Wanneer TCCF se gebou finaal in gebruik is gaan daar "skills development" prosesse ook vir die breër gemeenskap aan die gang gesit word.

*4. Sonder die finansiële ondersteuning van die Noordelike Sinode sou baie van dit wat ons reeds bereik het net nie moontlik gewees het nie. Met die Sinode se ondersteuning kan ons die rol van die NG Kerk as missionêre kerk uitbou en 'n verskil maak. Deur middel van kontakte in die Sinode kan 'n beter diens gelewer word en hoef die wiel nie noodwendig van vooraf ontwerp te word nie. Ons het baie hulp en raad ontvang - nie net binne die sinodale gebied nie maar ook uit ander oorde. Ons besigheidsplan bv. is gebaseer op MES-aksie in Johannesburg.

*5. Met die straatkinders het die Here vir ons 'n geleentheid geskep om diensbaar te wees. Omdat hulle nie aan 'n spesifieke groep behoort nie, is daar min indien enige organisasie wat bereid is om die verantwoordelikheid vir die straatkinders te neem.

5. BEJAARDES

*1. Kerkspieël 2010 het reeds aangetoon dat die gemiddelde ouderdom van N G Kerk lidmate besig is om te styg. Hierdeur word die kerk met 'n baie besondere uitdaging gekonfronteer. Die internasionale gemiddelde lewensverwagting is 67,2 jaar, teenoor 'n gemiddeld van slegs 49,3 in Suid-Afrika. Hierdie statistiek is skokkend as in ag geneem word dat uit 194 lande Suid -Afrika slegs die 178ste posisie inneem. Twintig lande wat die swakste vaar in terme van lewensverwagting is lande in die Suide van Afrika, met die uitsondering van Afghanistan. Die twee lande wat heel onder aan hierdie lys is, is ons bure Swaziland en Mosambiek. Zimbabwe en Lesotho val ook onder die laaste 6 lande met die laagste lewensverwagting. In Mosambiek, wat heel onder op die lys is, is die lewensverwagting slegs 39.2.

*2. Die Europese lande wat almal die boonste plekke op die lys inneem se gemiddeld het nou tot meer as 80 jaar gestyg. Indien hierdie statistiek as maatstaf vir die meerderheid van ons lidmate geneem word, is dit duidelik dat die NG Kerk gegewe hierdie tendens met 'n groot uitdaging gekonfronteer word. Voeg daarby dat beleggingskonsultante gereeld waarsku dat mense nie genoegsaam voorsiening maak vir hulle aftrede nie. Dan word die probleem duidelik: talle mense kan nie bekostig om af te tree nie.

*3. Bejaarde-bediening vorm 'n integrale deel van enige gemeente se bediening maar die vraag kan gevra word of die nood onder bejaardes in die algemeen genoegsaam deur ons kerk se bediening aangespreek word. Suid-Afrika word met 'n uiters unieke probleem rondom bejaardheid gekonfronteer. Waar Afrika 'n baie gevestigde tradisie gehad het van kinders wat na hulle ouers omsien en in hulle huise versorg, het hierdie tendens die afgelope dekade verander. Baie jonger mense sterf as gevolg van MIV/vigs met die gevolg dat daar 'n al groter wordende groep van veral swart bejaardes is wat nie behoorlik versorg word nie. Talle van hierdie bejaardes wat slegs op 'n staatspensioen staatmaak, word maklik die slagoffers van misdaad en uitbuiting. Die pensioene van hierdie bejaardes is in sommige gevalle die enigste inkomste vir 'n hele gesin en baie is daarvan afhanklik.

*4. Die bestaande ouderdomspensioen is ook nie voldoende om bejaardes wat versorging nodig het te help nie. Dit gebeur al hoe meer dat bejaardes in die later fase van hulle lewe nie versorg kan word nie. Hierdie uitdaging gaan in die toekoms vindingryke bedieningsoplossings van ons gemeentes vra. Gedurende 2011 het die SDGB se taakspan vir bejaardes dan ook 'n konferensie onder leiding van dr Willem Boshoff by Hartbeesspruit-Queenswood aangebied om prominensie aan hierdie problematiek te gee.

*5. In die Noordelike Sinode is ons baie bevoorreg om as bedieningsvennoot die SKDB Maatskappy te hê. 'n Groot deel van die SKDBM se bedieningsfokus sentreer om die behoeftes van bejaardes en dit is duidelik, gegewe die bovermelde uitdaging, dat gemeentes in die toekoms baie nouer met die SKDBM sal moet saamwerk. 'n Goeie voorbeeld van sodanige samewerking is die projek wat onlangs by Pretoria-Oos begin is. Hierdie projek behels dat die gemeente een van die pastorieë ingerig het as laekoste- behuising vir bejaardes. Hierdie huis word in ooreenkoms met die SKDBM as anneks van Huis Piek bedryf.

*6. Nog 'n baie unieke projek wat deur die SKDBM begin is, is die ontwikkeling van Harmonie Oord, 'n behuisingkema vir sub-ekonomiese bejaardes. Die Oord word so bedryf dat inwoners self sekere verantwoordelikhede neem om sodoende kostes te bespaar. By Harmonie Oord ontvang inwoners 'n tuiste en word hulle gevoed vir minder as R1 000 per maand.

*7. Die SKDBM verskaf verder infrastruktuur en bestuursvaardighede aan al die ander gevestigde tuistes vir bejaardes (sien SKDBM verslag). Die projek by Pretoria-Oos gemeente is 'n baie goeie voorbeeld van hoe gemeentes infrastruktuur as bedieningsinstrument kan aanwend. Gemeentes word versoek om hierdie model as moontlike projek te ondersoek. Indien 'n pastorie ontwikkel word as 'n behuisingprojek word die bate nog steeds behou en kan daar selfs 'n inkomste gegenereer word. As bedieningsorganisasie wat in direkte ooreenkoms met die Noordelike Sinode funksioneer, word daar meer breedvoerig oor die werksaamhede van die SKDBM gerapporteer.

Wat van pastorieë as behuisingprojekte?

5.1 SKDB Maatskappy

5.1.1 Funksionering

*1. Die SKDBM is 'n bestuurs- en koördinerende instansie van die NG Kerk se organisasies vir kerklike maatskaplike dienste in die gebied van die Noordelike Sinode. Dit is geregistreer as 'n Artikel 21 Maatskappy (met artikel 18A vrystelling) en as 'n organisasie sonder winsoogmerk. Die SKDBM verteenwoordig primêr die geformaliseerde maatskaplike dienste van wat histories uit die NG Kerk se barmhartigheidsdienste ontwikkel het. Die primêre doel van die organisasie is om 'n infrastruktuur te skep vir, en waarde toe te voeg aan die werksaamhede van diensorganisasies met wie die SKDBM 'n ooreenkoms het. Die SKDBM aanvaar as riglyn vir die etos en atmosfeer van dienste die volgende:

*1.1 dat die Kerk se barmhartigheidsbediening 'n noodwendige resultaat van die gelowiges se antwoord op die verlossingswerk van God Drie-enig is;

*1.2 dat die barmhartigheidsbediening primêr gemeentelik, onder leiding van die kerkraad en by name die diakonie, geskied;

*1.3 dat die barmhartigheidsbediening en die maatskaplike welsynsdienste gedoen word ooreenkomstig die volgende waardes:

- Godgefokus en barmhartigheidsgedrewe
- Aanvaarde bestuurspraktyke
- Mens- en gemeenskapsgerig
- Kwaliteitgerig
- Koste doeltreffendheid

*2. Die volgende persone dien op die direksie van die SKDBM: ds JH van Loggerenberg, dr GJ Cloete, ds JHP Serfontein, mnr L S de Kock (uitvoerende direkteur), mnr DW Steyn, mnr JB Kruger, mnr AJ du Preez, mnr V de Beer, dr GF Claassen en ds DH Janse van Rensburg. Daar is slegs drie voltydse personeellede, naamlik mnr L S de Kock (uitvoerende direkteur), me L van Biljon (uitvoerende sekretaresse) en me A van Deventer (finansiële bestuurder). Ds JHP Serfontein en ds JH van Loggerenberg dien onderskeidelik as koördineerders vir bejaardesorg en maatskaplike dienste.

*3. In die lig van die nuwe Maatskappywet is die SKDBM besig om 'n nuwe "Memorandum of Incorporation" op te stel en die ooreenkoms met die Sinode te hersien. Voorts is begin met 'n proses om die SKDBM se diensorganisasies wat as Artikel 21 Maatskappy gefunksioneer het, slegs as Organisasies sonder Winsoogmerk te registreer en ooreenkomste met die SKDBM te hersien. Op versoek van die SKDBM is 'n Taakspan van die DKB aangewys om sekere aspekte gesamentlik uit te klaar.

5.1.2 Diensleweringorganisasies binne die SKDBM-sisteem

*1. Die georganiseerde dienste in die SKDBM-sisteem word gelewer deur die residensiële versorgings- en behandelingsdienste, asook gemeenskapsdienste. Die dienste word grootliks gedentraliseer bestuur en bedryf om gemeenskapsbetrokkenheid te bevorder. Die sukses wat behaal word, kan toegeskryf word aan meer as 120 bestuurslede en 2 000 vrywilligers wat sonder vergoeding persoonlike opofferings maak vir die bevordering van die werk. Daarsonder sal die dienste moeilik kan voortbestaan. Die dienste word gelewer



GEBROKE



VRYGESPREK



DIENSAAR

deur meer as 600 personeellede wat met toewyding, liefde, lojaliteit, offervaardigheid en integriteit mense in nood bystaan.

*2. As gevolg van historiese- en ander faktore fokus die diensorganisasies hoofsaaklik op bejaardesorg-, kinder- en gesinsorgdienste, asook dienste ten opsigte van middelafhanklikheid. Die nuwe staatkundige bedeling en gepaardgaande nuwe behoeftes in die gemeenskap het tot gevolg dat daar toenemend op 'n gemeenskaps- en ontwikkelingsgerigte benadering gefokus moet word. Hierdie veranderinge vereis 'n nuwe verwysingsraamwerk, benadering en strategieë.

*3. Ons bring hoop en maak 'n verskil deur

- 8 Behuisingsprojekte vir 650 ouer persone
- 7 Versorgingsoorde vir 313 ouer persone
- 4 Aftree behuisingsprojekte vir 225 ouer persone
- 3 Kinderhuise wat 460 sorgbehoewende kinders versorg
- 19 Maatskaplike welsynsprogramme wat uitreik na meer as 6 000 gesinne waarby meer as 26 000 persone betrokke is

- 'n Sentrum vir middelafhanklikheid wat meer as 500 pasiënte per jaar behandel.

*4. Hierdie georganiseerde dienste wat in ooreenkoms met die SKDBM gelewer word, beskik oor fasiliteite ter waarde van meer as R220 miljoen en die gesamentlike bedryfskoste beloop R62 miljoen per jaar. In totaal is daar 670 personeellede in diens, 120 bestuurslede is op vrywillige basis betrokke asook sowat 2 100 vrywilligers.

5.1,3 Finansiering van dienste

*1. Die finansiering van maatskaplike welsynsprogramme skep groot uitdagings en die volhoubaarheid van dienste is baie onseker. Kritiese faktore is soos volg:

- Die jaarlikse daling in staatsubsidie as persentasie van standaardkoste.
- Die volgehoue afname in donasies as gevolg van ekonomiese toestande.
- Die finansiële vermoë van gemeentes.
- Lae rentekoerse.
- Die verandering in die toekenningsbeleid van Lotto-fondse.
- Beleid van die owerheid.

*2. Alhoewel die nasionale organisasies en forums reeds die afgelope vyf jaar met die tersaaklike regerings-instansies onderhandel, is daar geen vordering nie. Uit die Vrystaat hofspraak (Nawongo teen die Departement Maatskaplike Ontwikkeling – hoofsaaklik oor 'n onrealistiese finansieringsbeleid en oor laat betaling van subsidies) wat steeds in proses is, is dit baie duidelik dat selfs statutêre dienste nie vir die staat 'n prioriteit is nie. Op hierdie stadium is dit onvermydelik dat dienste afgeskaal of getermineer moet word.

5.1.4 Uitdagings

*1. Die SKDBM en sy diensorganisasies het hom verbind om saam met die kerk die volgende uitdagings te ontmoet:

- Positionering as geloofsgebaseerde organisasie wat maatskaplike welsynsdienste lewer in Suid Afrika se nuwe politieke bedeling.
- Bevordering van die maatskaplike funksionering van mense en gemeenskappe met spesifieke nood: armoede, sorgbehoewende kinders en gesinne, middelafhanklikheid en bejaardes.
- Skepping van groter kapasiteit vir volhoubare dienslewering

*2. Die NG Kerk het deur die jare kollektief deur middel van die Sinode en ringe, asook deur gemeentes se betrokkenheid, die kerk se georganiseerde deernisbediening in stand gehou. Die SKDBM spreek ook sy dank uit teenoor die sinode vir die finansiële ondersteuning van die CMR en Harmonie Oord. Duisende kerkleiers, ampsdraers, lidmate en personeel het deur baie jare (en sal steeds in die toekoms) hulle gawes aan die kerk se barmhartigheidsdiens beskikbaar stel. Ons dank God vir al hierdie diensknegte en diensmaagde. Met ons visie om hoop te bring en 'n verskil te maak, aanvaar ons die uitdagings wat vir ons voorlê. Ons doen dit biddend en diep afhanklik van die Here Jesus, die Koning van die Kerk. Mag die Heilige Gees ons die toerusting en die krag daartoe gee.

6. EKOLOGIE

*1. Dat die aarde, en eintlik alles wat bestaan, onlosmaaklik aan ons geloof gekoppel is, is nie 'n nuwe insig nie. Vir ons wat alles wat bestaan as "skepping" beskryf, en wat telkens ons geloofsbelydenisse begin deur ons geloof in die Skepper te verwoord, is daar 'n konstante herinnering dat wat gebeur met die aarde (en eendag sal ons ook verder as net die aarde moet dink), deel is van dit waaroor ons geloofsrefleksie moet gaan. Die Nederlandse Geloofsbelydenis (art 2) beskryf die skepping en God se onderhouding van die skepping as "'n mooi boek waarin alle skepsels, groot en klein, die letters is wat ons die onsigbare dinge van God, naamlik sy ewige krag en goddelikheid, duidelik laat sien". In samehang met die belydenis van God as Skepper word die mens dus beskryf as die bewaarders van die skepping.

*2. Daar is vandag 'n oproep dat ekologiese vraagstukke op 'n nuwe manier op die agenda van die kerk, in al sy vorme, moet kom. Die bekende wetenskaplike, Carl Sagan, het in 1990 gepleit dat die godsdienste betrokke moet raak by ekologiese vrae. Ook hy het erken dat godsdienstige organisasies 'n belangrike rol kan speel om bewegings rondom groot morele vraagstukke aan die gang te kry. (http://earthrenewal.org/Open_letter_to_the_religious_.htm) Die Moderamen van die Algemene Sinode het onlangs vraagstukke rondom die ekologie en 'n volhoubare leefstyl as beide dringend en belangrik beskryf. (ASM-vergadering van 31 Oktober 2011-2 November 2011).

*3. Hierdie oproep is van groot belang aangesien mense oor die afgelope eeue tegnologie begin ontwikkel het wat die potensiaal het om die fyn balans van die ekologie permanent te versteur. Uit verskeie oorde word ons vandag herinner dat hierdie aarde ons enigste tuiste is, en dat dit werklik moontlik is dat ons hierdie tuiste as 'n ongunstige plek vir ons kinders kan nalaat.

*4. Vir die kerk is daar dus 'n dubbele motivering: ons is geroep om as deel van God se skepping na God se skepping om te sien, en ons is geroep om die belangrike vraagstukke van ons tyd ook op ons agenda te plaas.

6.1 Wat moet op ons agenda wees?

*1. Die ekologie is 'n wye onderwerp. 'n Paar sake is veral van belang in Suid-Afrika en Afrika in die breë.

*1.1 Daar is 34 biodiversiteit "hotspots" in die wêreld. Dit is areas wat unieke plant- en dierlewe bevat wat tans bedreig word deur mense se toedoen. Drie van hierdie areas val eksklusief binne die grense van Suid-Afrika. Ons het dus 'n unieke verantwoordelikheid om hierdie areas op te pas. (http://www.conservation.org/where/priority_areas/hotspots/africa/Pages/africa.aspx).

*1.2 'n Tweede saak wat veral vir Suid-Afrika van belang is, is water. Vrae rondom water is besig om reg oor die wêreld toenemend belangrik te word. Die vrees is dat ons nie genoeg water vir toekomstige behoeftes kan verskaf nie.

*1.3 Een saak wat ekologiese vraagstukke so kompleks maak, is dat die hele aarde as een sisteem, party beskryf dit in werklikheid as 'n organisme, funksioneer. Ons kan dus nie ekologiese vraagstukke veilig afbaken tot 'n bepaalde geografiese gebied nie. Dit word veral duidelik wanneer daar gekyk word na projeksies rondom globale verwarming. Wat hierdie onderwerp veral op ons agenda plaas, is dat projeksies aandui dat Afrika as kontinent uitermatig geaffekteer gaan word.

*2. Wanneer ons as kerk deelneem aan debatte rondom die ekologie, veral as kerk van Afrika en kerk in Afrika, dan het ons 'n spesifieke verantwoordelikheid om telkens te herinner dat ekologiese vraagstukke nie losgemaak kan word van die krisis van armoede nie. Antwoorde op enige van hierdie twee vrae wat nie die ander vraag ernstig opneem nie kan nie op die langtermyn oplossings verskaf nie. Ekologiese rampe het telkens die grootste effek op hulle wat reeds die mees kwesbare mense in die samelewing is. Ekologiese oplossings moet ook erns maak met die pogings om 'n einde aan armoede te maak. Die een gesprek mag nie die ander een troef nie. (http://a.cen.anglicancommunion.org/resources/docs/DeGruchy_An_Olive_Agenda.pdf).

*3. Hierdie is slegs 'n paar belangrike voorbeelde van wat op die agenda van die kerk moet kom. Die lys kan verleng word en die gesprek oor hierdie prioriteite behoort ook deel te vorm van ons refleksie oor kerkwees in Suid Afrika vandag. Die SDGB, onder leiding van dr Gustav Claassen, het in hierdie verband reeds twee suksesvolle ekologie konferensies aangebied en hoop dat hierdie saak ook as prioriteit op die Sinode se agenda sal bly.

6.2 Wat kan gemeentes doen?

*1. Verskeie gemeentes het hulleself al op verskeie maniere verbind om ekologiese vraagstukke op hulle agenda te sit.

- *NG Universiteitsoord* (en verskeie ander gemeentes) het 'n herwinningsdrom op die kerkterrein beskikbaar gestel. Aangesien 'n groot hoeveelheid mense in elk geval elke week 'n draai by die kerk kom maak, hoef hulle dan nie spesiaal te ry nie. Dit word ook 'n diens aan die gemeenskap. So 'n drom kan ook 'n simbool word van 'n groter verbintenis waartoe die gemeente geroep word as 'n herinnering dat ons prakties besig moet wees om na die aarde te kyk. Gemeentes kan Mpack Recycling tolvry skakel (0800022112) om meer inligting te kry oor hoe papier-herwinningsdromme bekom en bestuur kan word.

- *NG Stellastraat* is tans 'n prototipe gemeente waar gemeentedele begelei word rondom energieverbruik. 'n Adviseur help huisgesinne om die elektrisiteitsgebruik van verskillende toebehore te meet, en raad te gee oor hoe elektrisiteitsverbruik verminder kan word. Terselfdertyd is die gemeente besig om stelselmatig die pastorieë en kerk se energie- en watergebruik aan te spreek.

*2. Die belangrikste rol van kerke is om mense te leer om 'n nuwe taal te praat en om 'n nuwe lewenstyl aan te leer. Dit gaan oor meer as 'n ekologie-Sondag een maal per jaar, maar oor 'n ekologie-teologie - 'n teologie wat die aarde ernstig neem as God se skepping, en daarmee saam 'n lewenstyl van eenvoud wat in harmonie met die aarde en die armes is. Ons sal ook krities na ons eie teologie en prediking moet kyk en



GEBROKE



VRYGESPREEK



DIENSBAAAR

vra of ons nie met tye bygedra het tot 'n wêreld beeld wat van die aarde 'n verbruiksartikel gemaak het eerder as God se geskenk aan ons nie.

*3. Daar is meer stories, en ons sal 'n punt daarvan moet maak om dit wat ons leer met mekaar te deel sodat gemeentes prakties meer bewus kan raak van hulle verantwoordelikheid teenoor die aarde. In 1993 het Paul Gorman die bekende uitspraak gemaak dat "...how people of faith engage the environmental crisis will have much to do with the future well-being of the planet, and in all likelihood, with the future of religious life as well." In 'n land waar die meerderheid van mense vanuit die Christelike tradisie tap wanneer hulle morele besluite neem, word die kerk se refleksie oor hierdie saak krities belangrik.

7. ZIMBABWE

*1. By die 2008-sinode is gerapporteer dat "die politieke toestand en gepaardgaande sosiale en maatskaplike toestande ongelooflik versleg" het. Dit is met dankbaarheid dat nou gerapporteer kan word dat die situasie oor die afgelope paar jaar 'n 'n groot mate gestabiliseer het.

*2. In die moeilike tye het hulpverlening vanaf die Noordelike Sinode 'n reuse-bydrae gelewer om aan baie mense noodsaaklike voorrade, veral medikasie, te voorsien. Die hulpverlening het heelwat afgeskaal maar daar moet nog van tyd tot tyd noodsaaklike voorrade aangekoop en aangestuur word.

*3. Hierbo is gesê dat die posisie gestabiliseer het. Dit kan egter nog lank nie gesê word dat die toekoms rooskleurig vir die land lyk nie. Baie van mense, binne en buite die NG Kerk, kry finansiële swaar. Dit is veral bejaardes wie se pensioene en spaargeld tydens die tye van buitensporige inflasie waardeloos gemaak is, wat nou swaarkry.

*4. 'n Ligpunt vir die algemene bediening in Zimbabwe is die bevestiging van ds Theunis Botha in Februarie vanjaar. Ds Botha is 'n leraar van die Nederduitsch Hervormde Kerk en sy standplaas is Bulawayo. Sy pastorale bydrae help om die las op die NG-leraars ligter te maak.

*5. Zimbabwe mag egter nog lank nie van ons gebedslysies afgehaal word nie. Die politieke en maatskaplike omstandighede stel steeds groot eise, veral emosioneel, aan die land se inwoners. Finansiële ondersteuning kan steeds deur die sinodekantoor gekanaliseer word.

8. SLOT

Is die N G Kerk 'n gemeenskapskerk? Hierdie verslag wil beskeie sê, ons probeer. Ons kan sekerlik meer doen, maar ons doen ook baie. Indien ons as kerk sou onttrek sal dit inderdaad 'n verlies wees vir ons samelewing. Terselfdertyd leer ons al meer wat dit beteken om gemeenskapsgerig te bedien. Sedert die vorige sinodesitting het die Noordelike Sinode bykans R18.5 miljoen op gemeenskapsbetrokkenheid bestee, baie ure gewerk en in vertroue op God, gewaag. Daarvoor sê ons dankie aan elke gemeente, diensorganisasie en individu wat in verbondenheid aan die Lewende Here wel 'n verskil gemaak het.



AK LE ROUX (Voorsitter)



DH JANSE VAN RENSBURG (Skriba)